



## 連寶

還細，在過年該幾日，總係會有人在老伙房屋後背搭一個大篷布，裡肚人尖人，大家圍等一張四角桌，將把手項个銀票想辦法砵在桌頂項各有意義个地方。

該張桌仔中間畫有一個細空格，對格仔个四角向各個桌角再牽出四條線。桌仔一片係博場个頭家，中間坐一個安到「寶官」个人，佢坐个地方人人喊做「歸身」，厥對面係「出門」，坐一個人，安到「連手」。寶官个左手係青龍，右手定著就係白虎咧！還細時節，過年就看等大人在該哮哮喝喝，佢看毋識佢等在賭麼个？但係看多、聽久咗，對方向个名稱幾下十年都毋會添放核。

每一擺落注前，寶官會將么頭仔放在一個黃銅个筒管項搖上搖下，再用一個管座塞入去，等佢塞好就將歸付連寶頭仔放在桌仔中間个格仔項。這時節連手就會將這個連寶頭仔掄(nun`)幾下到，等到連手停手，佢就同黃銅筒仔放企正來。大家看著連寶企正咗，這時節尖滿桌仔四方个人大部分就跔等連手砵錢去賭一下輸贏。

該么頭仔每一面都係紅、白各一半，等到寶官同連手合作，將黃銅筒仔擲起來，就做得看著紅色面向青龍、白虎、出門也係歸身，佢向哪位，哪位就係著博(cog bog)。為著增加賭博个刺激性，寶官同連手兩個人總係挑事定定仔擲起黃筒、定定仔睇看啊白抑係紅。逐擺開寶，總係聽得著有人怨嘆个喊：哦呵！

佢印象中，係吾細舅做連手个話，來賭个人定著尖到滿滿。一斗下來，輸贏起碼都有幾下萬銀。該在三、四十年前係先生教書一年以上个薪水。係換做別人做連手，嘎！場面就毋係恁仔講咧。人人都說吾細舅十分會連，賭起這「連寶」，附近幾下莊頭就佢最壁。

舊年過年，在養老院个細舅分佢等接歸來寮。在新年新頭个時節講起頭擺，講啊講仔，佢對厥隨身个皮包仔拿出一個連寶頭仔分佢。佢問佢頭擺人說佢个事情敢係正个？佢噓噓仔解釋，其實佢就淨曉得擲黃銅頭。佢幾下擺砵錢都準準準，係因為在擲起來个過程，佢有偷睇著么頭仔。佢還講在博場項根本就無正式贏个人，就像佢逐年都會去搞，但係從來就無對博場項賺著食，該過程就像禾鵲仔蹶蹶糠——賺暢就有。

細舅將連寶頭仔送分佢，交代等佢「賭毋著食」。佢盡惱人賭博，但係對博場項，乜體會著毋會少个人生道理。這下看佢在養老院過生活，博場肚个哮喝聲淨伸在打嘴鼓个時節講來回憶，原來該連寶連來連去个係人生啊！

作者：陳志寧

### ☆詞彙學習☆

- |                           |                       |
|---------------------------|-----------------------|
| 【連寶】lien` bo`：一種賭博的工具和方法。 | 【哮喝】hau` hod`：相互么喝。   |
| 【博場】bog` cong`：賭場。        | 【么頭仔】ieu` teu` e`：骰子。 |
| 【寶官】bo` gon`：主持賭局的荷官。     | 【搖】zug：用力的搖晃。         |
| 【連手】lien` su`：掄動賭具的人。     | 【一斗】id` deu`：一場次。     |